



2024-imut aningaasanut inatsisissatut siunnersuut.

(Aningaasaqarnermut Akileraartarnermullu Naalakkersuisoq)

(Pingajussaaneernejarnera)

85 millioner koruunit. Uterpara. 85 millioner koruunit. Aningaasanik taama amerlatigisunik maani partiit sinneri 2024-imi innuttaasut kaasarfianniit saniatigut ukiumut aasassavaat. Tassa imaappoq, kalaallit tamarmik immikkut 1.500 koruuninik annaasaqartussanngortut. Ilaqutariit SIK malillugu akissarsiallit marlunnik meerallit, anaanaq ataatarlu imminnut atugassaminnut 6.000 koruuninik minnerusunik pisassapput. Uttoqqalinersiutillit aappariit, illuatungeriinnik pilersuisussaataanerup peernejarneranik persuarsiungaarnikut, naatsorsuutigisariaqassavaat, IA-p Siumut, Naleqqap aamma Atassut aningaasivimminniit 3.000 koruuninik aallernissaat. Ukorsiaa, taamaaliunnartoqarsinnaanngikkaluarpoq.

Erseqqilluinnartumik IA-p, Siumup Naleqqap Atassutillu aningaasat aassavaat sodavandit eqqunneqartut akittuutaasa appannginnerisigut. Ullumimut imaassimagaluarpormi, sodavandit maani nunatsinni maqinneqartut 3,50 koruuninik akittuuteqartinneqartarlutik, eqqussukkalli akitsuuteqartinneqartarlutik 7,50-mik. Nuuk Imeq matuneratigut atuisutut allatut ajornartumik eqqussukkanik sodavandinik pisisariaqalerput, taamaaliornikkut fire koruuninik akisunerulersitsisumik. Taassuma kinguneraa, Naalakkersuisut partiillu isumaqataasut innuttaasut kaasarfianniit immikkut 20 millioner koruuninik aallissasut. 65 millioner koruunit sinneruttut poortuutit akitsuuitaaniik aaneqassapput. Akitsuutit taakkutut ittut artorsareertunit artorsarnerulersitsipput, kingunerissallugulu, naligiinnginneruneq qaffannera. Uteqqillara, Naalakkersuisut aappaluttukkormiut IA siuttoralugu inuiaqatigiinni naligiinnginnerujussuaq annertusineqarnissaa aalajangerpaat. Ajorluinnarpoq akuersaarneqarsinnaanngilaq. Uagut Demokraatiniit soorunalimi tapersersunngilluinnarparput.

Aningaasanut Inatsisissaq 284,4 millioner koruuninik 2024-imi sinneqartoortussatut saqqummiunneqarpoq, taamaakkaluarporli IA, Siumut, Naleraq aamma Atassut isumaqarput, pisariaqartoq suli annertunerujussuarmik innuttaasut kaasarfiinniit aalleqqinnissaq. Illumut paasisinnaanngilluinnarpara annerpaamillu pissutaaqataavoq, uagut Demokraatiniit ukioq manna aningaasanut inatsisissamut isumaqatigiisummut atsiqataannginnitsinnut.

Peqqutaasoq annertoq aamma atsiqataannginnitsinnut tassaavoq, partiit atsiqataasut kissaatiginngimmassuk peqqinnissaqarfitta ilungersunarluinnartumik inissisimasoq naammattumik iliuuseqarfiginissaa. Partiit atsiqataasut 2024-imut peqqinnissaqarfimmut ilassutitut 35 millioner koruuniinnat immikkoortikkusuppaat. Annikippallaaqaat angusaqarluarusunnermillu takutitsinngilluinnarluni. Soorluli taqarsuaq aanaartoq mattusiarakasimmik mattuserniarsaralugu. Sunngilluinnarnermiik ajunnginneruvoq aap, naammannngilluinnarporli.



Ajornartorsiutip qiteraa, matussusiiginnartoqarmat. Immikkoortinneqartut ikippallaarput Peqqinnissaqarfiup unammillernartitaanut maannakkorpiaq pingaartumilli siunissaq ungasinnerusooq isigalugu.

Utoqqaat amerliartorput. Inooriaatsip peqqinnangitsup kingunerisaanik nappaatit amerligaluttuinnarput. Meeqqat inuusuttullu timikkut tarnikkulluunniit nappaatillit amerliartorput. Tamakku Peqqinnissaqarfimmut tamaviaartitsereerput ukiunilu tulliuuttuni sulit tamaviaartitsinerussallutik. Taakku piffissamut ungasinnerusumut pilersaarusiornissamik pisariaqartitsippat aammalu aningaasanik amerlanerusunik pisariaqartitsillutik.

Partiit akuerseqataasut Naalakkersuisullu piffissamut qanittumuinnaq matussutaasussamik toqqaasimapput, takorluugaqaratilli, siunissami peqqinnissaqarfik qanoq isikkoqassasoq isummerfiginagulu, sulisut suliuinnarnissaanik sulisussarsiornernullu ajornartorsiutaasut qanoq aqqinneqassanersut. Kisitsisit amerlasuusaartinneqarput oqarluni, 114 millioner koruuninik immikkoortitsisoqartoq. Eqqortorliuna unaasoq, tamanna ukiut sisamat ingerlaneranni pisussaammat. 2024-imi ilassutitut 35 millioner koruuniinnat immikkoortinneqarput, aningaasallu sinneri ukiuni missigersuusiortiusuni tunniunneqartussaallutik. Allatut oqaatigalugu, peqqinnissaqarfimmut suliaq annikippallaarpoq siunnerfeqanngippallaarlunilu. Demokraatiniit kissaatiginartikkaluarpurput, partiit akuerseqataasut sapiissusermik annertunerusumik takutitsisimanissaat ingerlatamullu taama pingaaruteqartigisumut aningaasanik amerlanernik nassaarsimanissaq.

Demokraatit maluginiarsimavaat, Naalakkersuisut partiillu akuerseqataasut utoqqatsissutipalaanik annissisut, sooq aningaasanik amerlanernik nassaarsinnaasimanninnerminnut. Oqarput, Peqqinnissaqarfimmut aningaasaleeqqissalluni ajornarluinnartoq, missigersuusiornermut inatsisip piumasaaqatai pisortat aningaasartuutaasa qaffatsaaliornissaanut malittariaqarsimagamikku. Demokraatit soorunami isumaqataapput, missigersuummut inatsit malissagipput. Soorunami taamaaliussaagut. Kinali oqarpa, sipaarutissanik nassaarsinnaanngitsugut pisortat ingerlataanni allani taakkulu sipaarutit Peqqinnissaqarfimmut aningaasaliissutigisinnaanngikkigut? Tamanna partiit akuerseqataasut kissaatigisimanngilaat. Partiit akuerseqataatut kissaatigisimanngilaat oqartussaaffinnit allanit aningaasat peqqinnissaqarfimmut atugassanngortinneqarnissaat.

Tassani Demokraatini paasinnittaaserput illuatungerluinnaaniippoq. Peqqinnissaqarfimmut aningaasanik amerlanernik nassaarusuppugut, isumaqaratta, tamanna pingaaruteqarluinnaqqissaartoq.

Siullerpaamik pingaarnertullu kissaatigaarput susassaqarfinni assigiimmik annertoqatigiissunik sipaarniartoqartassasoq. Tassani ilaatinneqartassanatik; peqqinnissaqarfik, isusumaginittuqqarfik ilinniartitaanerullu annersaa, majoriaq minillugu. Susassaqarfiit allat tamarmik ullumikkut missigersuutiminnit 2 procentimik sipaaruteqassapput. Koruunit tamarmik taakkuninnga aaneqartut Peqqinnissaqarfimmut aningaasaliissutitut atorneqassapput.

Taakku saniatigut Demokraatinit uparuartariaqarparput, Peqqinnissaqarfimmi inissisimaneq ima ajortigisutut isigigatsigu, immikkuullarilluinnartumik tapersiinnaalluta, Inatsisartuni inatsiliornissarput, 2024-imi aammalu 2024-iinnaq ajunngitsoq pisortat atuinerata qaffannissaannut killissarititaasoq



qaangerneqarpat Peqqinnissaqarfimmut aningaasanik naammattunik immikkoortitsinissaq siunertaralugu. Tassami Aningaasaqarnermut Naalakkersuisoq nammineq oqaatigaa inatsisartuniik pisinnaatitsissummik peqartuuguni taamaaliorsinnaalluni. Apeqquterujussuanngorporli; sooruna Naalakkersuisoq Naalakkersuisullu partiivisa pisinnaatitsissummik pinissartik ujartorsimangilaat? Piumassuseruna piunngitsoq, utoqqatsissutissaqanngilasi.

Naalakkersuisut partiillu akuerseqataasut pisortat allaffissornerannut aningaasartuutit amerlinissaat toqqarsimavaat, tamanna eqqumiittorujussuuvoq, tassami IA, Siumut, Naleraq aamma Atassut nuannarisuummassuk oqaatigissallugu, pisortat allaffissornerannut aningaasat annikinnerusut atortariaqartut. Demokraatiniilli paasivarput, Naalakkersuisut partiillu akuerseqataasut asuli oqaasiinnarmik ingerlatsisut. Susoqanngilluinnartarpormi, iliuitsimikkut takutinneqartoq killormorluinnaavoq.

Akileraatarnermummi aqutsisoqarfimmi allaffissornermut aningaasartuutit qaffanniarneqarput ukiumut 5 millioner koruuninik. Aamma takuarput, pisortat allaffeqarfiini milliunilikkaanik sipaarniarnerigaluaq taamaatiinnartariaqarsimasoq, naammassineqarsinnaasimangimmat. Aammattaq avataaniit siunnersortinut naammattumik sipaarniarneq piviusunngortinneqarsinnaasimangilaq. Naamattumillu digitaliseriinissaq aamma piviusunngortinneqarsinnaasimanani. Ajorsartutullu nalunaarutaavoq annertoorujussuaq, oqartuaannarluni, pisortat allaffeqarfiannut aningaasartuutit apparterusullugit, taamaaliorsinnaananili, piffissanngoraangat.

Taamatut oqareerlunga, oqartariaqarpunga aningaasanut inatsisissami soorunami aamma pitsaasunik imaqarmat Demokraatiniit tapersikkatsinnik. Taamaattuaannartussaavormi taama annertutigisumi aningaasanut inatsimmi.

Tassalu taamaappoq angajoqqaarsianut pissutsinik pitsanngorsaaniarnemut, utoqqalinersialinnut pissutsinik pitsanngorsaaniarnemut, aammalu 2024-imi ukiunilu tulliuuttuni missigersuusiorfiusuni sinneqartoorteqangaatsiarnissamut tunngatillugu. Tamanna iluarinarpoq. Soorunami taakkununga akerliulluta taasissanngilagut. Suliniutit taakku taperserpagut.

Taakkuli Peqqinnissaqarfimmut siunnerfeqanngilluinnartumik suliniuteqarnermut taartaasinnaanngilluinnarput, pisortat allaffissornikkut aningaasartuutaasa qaffannerannut aammalu paasissaanngitsumik 2024-imi kalaallit tamarluinnarmik kaasarfianniit 1.500 koruuninik aallerusussimanerat. Tamakku pissutaapput, aningaasanut inatsimmut tamakkiisumut akuersisinnaannginnitsinnut. Politikikkut suliamut pitsaanngilluinnartutut taasassaasumut.

Taamatuttaarlu pingaartuuvoq eqqaamassallugu, Aningaasanut inatsisip qulakkeermagu, inuiaqatigiit ingerlajuarnissaat aammalu assersuutigalugu pisortani sulisut inuillu pisortanillu pisartagaqartut aningaasat pisassatik pisinnaassamatigit. Taamaattumik aamma kissaatiginngilarput naaggaarluta taasinnissatsinnik.

Tamanna tunngavigalugu nalunaarutigissavara Demokraatit taaseqataassanngillat, aningaasanut inatsisissatut siunnersuut tamakkiisoq taasissutigineqalerpat.



DEMOKRAATIT
DEMOKRATERNE